

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԸՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Թ. Տարի, Թիւ 378, Ուրբաթ, 31 ՄԱՐՏ, 2017

ՀԱՄԱՅՆՔԱՅԻՆ

Յեղափոխական Երգերու Եզակի Երեկոյ (Նուիրուած «Նեմեսիս»-ի Գործունէութեան)



«Հայ յեղափոխական երգերը ոգեւորութեան եւ ներշնչման աղբիւր են: Անոնք պայքարի ազդու զէնքեր եղած են ու կը մնան»:

Հայ ժողովուրդի պատմութեան գանձարանը հարստացնող հիմնական գոհարներէն մէկը եղած է հայ երգը, ի մասնաւորի՝ յեղափոխաշունչ երգը, որ իր ոգեւորիչ ազդեցութեամբ անմահացուցած է մեր յաղթանակի կերտիչները՝ անոնց ձեռք բերած անուրանալի նուաճումներով:

Ազգահայրենասիրական եւ յեղափոխական երգերու պահպանումն ու փոխանցումը սերունդէ սերունդ՝ սրբազան առաքելութիւն է, որովհետեւ անիկա փոխանցումն է պատմութեան յիշողութեան:

ՀՅԴ «Քրիստափոր» երիտասարդական եւ «Հ. Դժոխք» պատանեկան միութիւններու վարիչ կազմը, հաւատարիմ իր առաքելութեան, ուրբաթ, 24 մարտ 2017-ին

նախաձեռնեց Յեղափոխական Երգերու երեկոյի մը, եւ զայն ձօնեց ՀՅԴ-ի վրիժառու բազուկներու՝ «Նեմեսիս»-ի գործողութեան:



Քուէթի եւ շրջակայից թեմի առաջնորդ Մասիս ծ. վրդ. Զօպույեանի հովանաւորութիւնը վայելող այս երեկոն լիացաւ կատարողութեամբ Տուպէլէն ժամանած, Քուէթի հարազատ գաւակ՝ Բաֆֆի Հալէպէանի երգով՝ երգեհոնի նուագակցութեամբ, լիբանանահայ օրկանիստ Աւօ Ջայլեանի:

Մերլի Թովմասեան իր բացման խօսքով անդրադարձաւ 96 տարիներ առաջ Դաշնակցութեան ծրագրումով իրականացած «Նեմեսիս»-ի սխրագործութեան, որուն հերոսները Խրիմեան Հայրիկի երկաթէ շերտի կուռ պատգամով խորտակեցին հայ ժողովուրդին դիմաց ցցուած լռութեան պատը եւ վերականգնեցին արդարութեան նժարը:

«Վիտոշի բազէն» երգով սկիզբ առաւ երեկոյի առաջին բաժինը, ապա հնչեցին հին ու նոր տասնեակ երգեր, ինչպէս՝ «Հայոց մարտիկներ», «Արագի ափին», «Քեռիի յիշատակին», «Լերան լանջին» եւ այլ երգեր, որոնց պատգամներով յեղափոխական պատմութեան փառահեղ էջերը մէկ առ մէկ տողանցեցին եւ վերյիշում կատարեցին մէկ ու քառորդ դարու մէջ արեան գնով ձեռք բերուած յաղթանակները:




«Գինի լից» երգի ընթացքին ՔԵՄ-ականներու կատարողութեամբ գործադրուեցաւ կենդանի պատկեր մը, որ կը մարմնաւորէր «Նեմեսիս»-ը ծրագրող մարմինի գաղտի ժողովն ու Թէհլիրեանի արդար գնդակով սաստկած, Թալէաթ փաշայի սահաբեկման խորհրդաւոր պատկերը, որ խրախուսեց հանդիսատէսը:

Յայտագրի յաջորդ բաժնով վարիչ կազմի ներկայացուցիչ Յարութ Պետիրեան կազմակերպիչ մարմինին խօսքը արտասանեց՝ նշելով, որ հայ ազգը յարատեւ պայքարի երկար կենսափորձ մը ունեցած է եւ կը դիմագրաւէ բազմաթիւ մարտահրաւերներ, հայրենիքի եւ սփիւռքի մէջ, եւ այդ մարտահրաւերներու յաղթահարման համար իր ուշադրութեան կիզակէտը կը դարձնէ երիտասարդութեան պատրաստութեան եւ դաստիարակութեան հարցերը: Ան շեշտեց, թէ որպէս ՔՔԵՄ ՀԴՊՄ՝ հաւատալով հայ ազգի փառապանծ ապագային, մեր գրաւը այսօր կը դնենք մեր

երիտասարդության վրայ եւ այս սուրբ գործին համար կը խոստանանք որեւէ ճիգ չինայել՝ կատարելով մեր լաւագոյնն ու ազնուագոյնը:

Ապա բեմ հրաւիրուեցաւ 16 պարման-պարմանուհիներու խոստման կարգի կնքահայր Արմէն Արմուտճեան, որ իր սրտի խօսքը արտասանեց նորագիրներուն՝ պատգամելով անոնց, որ տէր դառնան այս դարաւոր կուսակցութեան նախանձելի աւանդին, նոյն վճռակամութեամբ շարունակեն իրենց պապերուն անխնջ պայքարը եւ բժախնդրութեամբ ստանձնեն իրենց վստահուած առաքելութիւնը՝ դառնալով օրինակելի դաշնակցական պատանիներ: Ապա թեմիս առաջնորդ հայր սուրբը իր հայրական օրհնութիւնները բաշխեց ներկաներուն եւ այս խոստումը նկատեց որպէս խթանիչ անկիւնադարձ՝ անոնց երթի շարունակման ճամբուն վրայ:



«Տունն իմ հայրենի», «Պանք Օթոման», «Կովկասի քաջեր» եւ «Լիզպոնի 5-ին» երգերը իրենց թելադրականութեամբ ներշնչեցին ներկաները. գործադրուեցաւ Լիզպոնի տղոց նուիրուած կենդանի պատկեր մը, որ մարմնաւորեց սփիւռքահայ հերոսներու անձնասպանական գործողութիւնը, որոնք չէին համոզուած բնական մահով մեռնելու գաղափարին ու զոհը դառնալու ճակատագրի խաղերուն, այլ որպէս հայ դատի զինուոր՝ որոշած էին իրենց կեանքերը զոհել:

«Սուրիահայ քաջեր» երգը՝ Բաֆֆիի մեկնաբանութեամբ յատուկ ոգի ստացաւ Սուրիոյ մեր անվեհեր տղոց սխրագործութիւնները պայծառացնելով: Երեկոյի խանդավառութիւնը հասաւ իր գագաթնակէտին, երբ աւելի քան 400 հաշուող քուէյթահայեր միաձուլուելով երգիչին առթած յեղափոխաշունչ մթնոլորտին մէջ, ՀՅԴ-ի եւ եռագոյն դրօշներով իրենց մասնակցութիւնը բերին երգեցողութեան, ի մասնաւորի՝ «Արիւնոտ դրօշ»-ի փակման երգին:

Քիչ մը աւելի ոգեւորուած եւ ներշնչուած, ներկաները հեռացան Ազգ. վարժարանի շրջափակէն՝ իրենց հետ տանելով պրոշիր-գրքոյկ մը, որուն առաջին էջերուն մէջ ամփոփուած էր «Նեմեսիս»-ի պատմականն ու վրիժառու բազուկներու կենսագրականները, իսկ վերջին էջերը կ'ընդգրկէին 16 նորագիրներու խոստումնագրերը, որոնք իրենց սրտի հարազատ արտայայտութիւնները արձանագրած էին՝ անսակարկ նուիրումով պայքարը շարունակելու խոստումով:

ՄԱՐԻԱ ՍԱՐԳԻՍԵԱՆ

Տեղի Ունեցաւ Հեռաժողով Քուէթի Հայ Համայնքի Ներկայացուցիչներուն Հետ

Մարտ 27-ին ՀՀ սփիւռքի նախարարութեան մէջ տեղի ունեցաւ հեռաժողով Քուէթի հայ համայնքի ներկայացուցիչներուն հետ:

Հեռաժողովի մասնակիցներուն ողջունեց ՀՀ սփիւռքի նախարար Հրանտյշ Ծակոբեան: Ան մասնաւորապէս նշեց. «Քուէթը մեր հօր, կուռ եւ համախմբուած



հայկական համայնքներից է: Այս տարի ակնկալում ենք մեր ծրագրերին Քուէթի հայ համայնքի ամենասկտիւ մասնակցութիւնը: Մենք մեծ ուշադրութիւն ենք դարձնում մասնագիտական ցանցերի ստեղծմանը: Դուք պէտք է դառնաք համահայկական կառոյցների մի մասը»:

Նախարարը կարեւոր համարեց Հայաստանի մէջ ներդրումային քաղաքականութեան աշխուժացումը: «Մենք ելք չունենք դէպի ծով, մեր ելքը հայկական Սփիւռքն է: Սփիւռքի մեր հայրենակիցները պէտք է աշխատատեղեր ստեղծեն Հայաստանում՝ նպաստելով Հայրենիքի շէնացմանը», – նշեց ան:

Քննարկուեցաւ Քուէթի հայ համայնքէն ներս «Դուն ի՞նչ կ'ընես Արցախի համար» շարժումը աշխուժացնելու հետ կապուած հարցը: Մասնակիցները կարեւոր համարեցին համահայկական ցանցերու ընդլայնումը եւ մասնագիտական ներուժի օգտագործումը Հայաստանի եւ Արցախի տնտեսութեան զարգացման գործին մէջ: Այնուհետեւ անդրադարձան ՀՀ ներդրումային ծրագիրներուն մասնակցութեան հնարաւորութիւններուն, Հայոց ցեղասպանութեան միջազգային ճանաչման, դատապարտման եւ հետեւանքներու վերացման գործընթացքին, ինչպէս նաեւ երիտասարդութեան շրջանին մէջ պատմական յիշողութեան ամրապնդման ուղղուած քայլերուն:

Շնորհակալություն յայտնելով նման առցանց քննարկում կազմակերպելու համար՝ Քուեյթի Պետության մեջ ՀՀ արտակարգ եւ լիազոր դեսպան Մանուէլ Բաղէեան նշեց, որ Քուեյթի հայ համայնքը աշխոյժ է Հայաստանի մեջ ներդրումներ կատարելու գործին մեջ:

«Մենք պետք է օգտագործենք այստեղի հայության նաեւ մտաւոր ներուժը: Քուեյթում շատ լաւ են վերաբերում Հայաստանին եւ հայությանը: Քուեյթում շուտով կը գործի նորակառոյց հայկական եկեղեցին: Մեծայարգ տիկին Յակոբեան, սիրով հրաւիրում ենք Ձեզ եկեղեցու բացման արարողութեանը», – նշեց Մանուէլ Բաղէեան:

Քուեյթի եւ Արաբական ծոցի երկիրներու կաթողիկոսական փոխանորդ հոգեշնորհ Տէր Մասիս ծ. վրդ.Ջոպույեան նշեց. «Քուեյթահայութեան համար Հայաստանի ու Արցախի հզօրացումը առաջնային խնդիր է: Մենք մեր կապերը պետք է ի սպասս դնենք Հայաստանի զարգացման: Իսկ Արցախի մեջ պետք է վստահ ըլլան, որ Սփիւռքն իրենց կողքին է»:

Քուեյթի Հայ դատի պատասխանատու դր. Ժան Պեպէճեան աւելցուց. «Մենք կ'ողջունենք ՀՀ Վարչապետ Կարէն Կարապետեանի կոչը՝ ուղղուած Սփիւռքին եւ խանդավառուած ենք նոր սկիզբով»:

Ելոյթ ունեցան Քուեյթի Պետության մեջ ՀՀ դեսպանութեան հիւպատոս Լեւոն պետրոսեան, Քուեյթի ազգային վարժարանի հոգաբարձու Ֆիլիփ Փաթաթանեան, ՀՕՄ ատենապետ Անժելա Պեպէճեան, Քուեյթի Ազգային վարժարանի տնօրէն Ներսէս Սարգսեան, Քուեյթի Ազգային վարչութեան ատենապետ Մունիր Դարբինեան, Քուեյթի եւ Արաբական Ծոցի երկիրներու թեմական ժողովի ատենապետ Յարութին Պետիրեան, Համազգային հայ կրթական միութեան տեղապահ Ալվարդ

Պապլանեան, ՀՄԸՄ Քուեյթի մասնաճիւղի ատենադպիր Յովհաննէս Մերոբեան:

Անոնք կարելոր համարեցին ՀՀ սփիւռքի նախարարութեան յատկապէս «Արի տուն», «Սփիւռք» ամառնային դպրոց ծրագիրներուն, «Իմ Հայաստան» եւ միւս համահայկական փառատօններուն համայնքի աշխոյժ մասակցութիւնը:



ՀԱՅԿԱԿԱՆ

Շրջան Այցելություն Ետք ԵԱՀԿ-ի Մինսքի Խմբակի Համանախագահները Հանդես Եկած Են Ցայտարարությամբ

ԵԱՀԿ-ի Մինսքի Խմբակի համանախագահները շրջան կատարած իրենց այցելությունն ենք հանդես եկած են յայտարարությամբ:

ԵԱՀԿ-ի պաշտոնական կայքը կը տեղեկացնէ, որ ԵԱՀԿ-ի Մինսքի Խմբակի համանախագահներ Իկոր Փոփով (Ռուսիա), Սթեֆան Վիսքոնթի (Ֆրանսա) եւ Ռիչըրտ Հոկլընտ (Միացեալ Նահանգներ), ինչպէս նաեւ ԵԱՀԿ-ի նախագահի անձնական ներկայացուցիչ Անճէլ Քասփրչիք 11 մարտին եղած են Պաքու, իսկ 27 մարտին՝ Երեւան, այնուհետեւ՝ Լեռնային Ղարաբաղ:

Ըստ յայտարարութեան, համանախագահներու շրջան կատարած այցելութեան նպատակն է ընդհանուր պատկերացում ունենալ շփման գիծի եւ հայ-ազրպէյճանական սահմանին տիրող քաղաքական, զինուորական իրավիճակին վերաբերեալ, քննարկել 2016-ին Վիեննայի եւ Ս. Փեթերսպուրկի մէջ տեղի ունեցած հանդիպումներուն ընթացքին կողմերուն միջեւ գոյացած պայմանաւորութիւններու իրականացման ընթացքը:

Համանախագահներու յայտարարութեան մէջ նշուած է, որ անոնք հանդիպում ունեցած են Հայաստանի եւ Ազրպէյճանի նախագահներու, արտաքին գործոց նախարարներու, ինչպէս նաեւ Արցախի իշխանութիւններուն հետ: Նաեւ այցելած են Լեռնային Ղարաբաղ:

Իշխանութիւններու հետ հանդիպումներուն ընթացքին համանախագահները արտայայտած են իրենց խորին մտահոգութիւնները շփման գիծին մէջ պատահած վերջին իրադարձութիւններուն առնչութեամբ՝ կողմերուն կոչ ուղղելով իրենց ելոյթներուն եւ գործողութիւններուն մէջ զսպարհութիւն ցուցաբերելու:

Համանախագահները առաջարկած են, որ յատկապէս Նովրուզի եւ Զատիկի տօներուն կողմերը խուսափին լարուածութեան սրումէն:

Անոնք յայտնած են նաեւ, որ պատրաստ են շարունակելու բանակցային հոլովոյթը՝ մինչեւ տագնապին խաղաղ եւ քաղաքական լուծում գտնուի:

Երկու երկիրներու իշխանութիւններուն հետ հանդիպումներուն ընթացքին, ըստ յայտարարութեան, համանախագահները ընդգծած են դեսպան Քասփրչիքի առաքելութեան աջակցութիւնը եւ անոր սկզբունքային նշանակութիւնը: Համանախագահները նաեւ պնդած են, որ զինադադարի նկատմամբ յարգանքը կարեւոր է հետագայ բանակցութիւններուն ընթացքին կառուցողական եւ փոխադարձ վստահութեան մթնոլորտ ձեւաւորելու համար:

Ռուստամեան. «Ձեր Չայնը Պիտի Որոշէ, Թէ Ձեր Ապագան Որո՞ւ Պիտի Ցանձնէք»

Երէկ Դաշնակցութեան ներկայացուցիչները հանդիպում ունեցան Երեւանի Նոր Նորք թաղամասի ընտրողներուն հետ: ՀՅԴ համապետական ցուցակը գլխաւորող՝ ՀՅԴ Բիւրոյի քաղաքական ներկայացուցիչ Արմէն Ռուստամեան, դիմելով ներկաներուն ըսաւ, որ իրենց

քաղաքական ուժին ձայն տալը կը նպաստէ, որ եղած ձեռքբերումները աւելի խորանան: «Մենք այս ընթացքին եղած ենք տարբեր մարզերու մէջ եւ շատ լուրջ ակնկալիքներ ունինք, որ դուք, Դաշնակցութեան ըրածը գնահատելով, կարելիութիւն կու տաք շարունակելու մեր այն գործը, որ սկսած ենք: Մեր ունեցած ձեռքբերումներն են, որ մեզի այսօր կարելիութիւն կու տան՝ մտածելու, որ մենք 2 ապրիլէն ետք պիտի ապրինք նոր Հայաստանի մէջ, որովհետեւ պիտի ունենանք նոր որակի իշխանութիւն եւ այդ որակը պայմանաւորուած պիտի ըլլայ նոր համակարգով, որ ամրագրած ենք: Մեր ժողովուրդին մէջ լուրջ եւ արդարացի դժգոհութիւն յառաջացած է, մենք վերացուցած ենք այն խոչընդոտը, որ թոյլ չէր տար, որ ընտրութիւններուն նկատմամբ վստահութիւն եւ հաւատք ունենայիք, որ ձեր քուէի արժէքը կորսնցնէիք», ըսաւ Ռուստամեան՝ աւելցնելով, որ ամէն ինչ ըրած են, որ համակարգ փոխուի եւ միանձնեայ որոշումներ կայացնողներ չըլլան:

«Այս ընտրութիւններով Հայաստան նոր շունչ պիտի ստանայ, պիտի ունենանք կարելիութիւն, որ մինչեւ հիմա չլուծուած հարցերը լուծուին, եւ անոր մէջ Դաշնակցութեան դերակատարութիւնը էական է: Մենք պիտի չհրապարակենք որեւէ թիւ, որեւէ մակարդակ՝ կապուած ձեզ յուզող կենցաղային հարցերը լուծելու հետ, որովհետեւ մենք եկած ենք այդ հարցերը արմատապէս լուծելու տրամաբանութեամբ: Մենք չենք ըսած, որ աշխատավարձերը պիտի բարձրացնենք երկու անգամ, թոշակները՝ երեք անգամ, որովհետեւ մենք կ'ըսենք, որ պիտի յառաջացնենք նոր համակարգ: Պետութիւնը պէտք է կարելիութիւն տայ, որ դուք գոյատեւելու համար ունենաք անհրաժեշտ բոլոր պայմանները», նշեց ան՝ ընդգծելով. «Ձեր ձայնը պիտի որոշէ, թէ ձեր ապագան որո՞ւ պիտի յանձնէք»:

2 Ապրիլին Կարելիութիւն Ունիք Մաս Կազմելու Արդար Հայաստան Կերտելու Նոր Սկիզբին

Կարելու է, որ դուք գիտակցիք՝ 2 ապրիլին կարելիութիւն ունիք մաս կազմելու արդար Հայաստան կերտելու նոր սկիզբին: Երէկ Աւան վարչական շրջանին մէջ Դաշնակցութեան նախընտրական քարոզարշաւին ընթացքին այս մասին ըսաւ ՀՅԴ Բիւրոյի անդամ, ՀՅԴ Հայ դատի եւ քաղաքական հարցերու պատասխանատու Կիրո Մանոյեան:

«Մենք այլեւս միայն Ազգային ժողով պիտի ընտրենք, եւ Ազգային ժողովը պիտի ձեւաւորէ գործադիր իշխանութիւնը եւ ընտրէ նախագահը: Այդ պատճառով 2 ապրիլի ընտրութիւնները որոշիչ դերակատարութիւն պիտի ունենան յառաջիկայ 5 տարիներուն: Ազգային ժողովը կարելիութիւն ունի նաեւ փոխելու երկրի վարչապետը, եթէ կառավարութեան աշխատանքը գոհացուցիչ չըլլայ, եւ կարելի է ըսել, որ յառաջիկայ 5 տարիներուն քաղաքական զարգացումները անկանխատեսելի են», ըսաւ Մանոյեան:

Ան նաեւ անդրադարձաւ ընտրակաշառքներու մասին խօսակցութիւններուն՝ նշելով, որ իրաքանչիւրի քուէն շատ կարելու է. «Եթէ կարելու չ'ըլլար, այդքան կաշառքի առաջարկներով չէին ներկայանար»:

Մանոյեանի համաձայն, այն քուէն, որ ազատ կամքով կը տրուի որեւէ քաղաքական ուժի, ատիկա Դաշնակցութեան համար նոյնպէս քուէ է: «Ատիկա կը նշանակէ, որ իսկապէս ժողովուրդի կամքի դրսեւորում է, իսկ մեր ջանքը եղած է, որ ժողովուրդը ունենայ իր իշխանութիւնը ընտրելու կարելիութիւն», ըսաւ ան:

Կիրո Մանոյեանի փոխանցումով՝ նախորդ համապետական ընտրություններուն ոչ մէկ քաղաքական ուժ համամասնական ընտրակարգով 50 առ հարիւր ձայն ստացած է: Եւ ըստ անոր, շատ անբնական եւ ոչ թափանցիկ պիտի դիտարկուի, եթէ որեւէ ուժ այս ընտրություններուն կարենայ 50+1 ձայն ապահովէ:

Բագրատ Եսայեան. «Դաշնակցութիւնը Որեւէ Վարչական Լծակ Չ'օգտագործեր»

Էրեբունի եւ Կեդրոն վարչական շրջաններուն մէջ վարկանշային ցուցակով առաջադրուած ՀՅԴ-ի թեկնածու Բագրատ Եսայեան երէկ լրագրողներու հետ հանդիպումի մը ընթացքին, խօսելով ընտրողներու իրաւագիտակցութեան մակարդակի բարձրացման գծով անոր ուղղուած յստակ քայլեր կատարելու անհրաժեշտութեան մասին, ընդգծեց, որ փոխուած Սահմանադրութիւնը եւ Ընտրական օրէնսգիրքը ստեղծած են այնպիսի կարելիութիւններ, որ մարդոց իրաւունքները կարելի եղածին չափ քիչ ռոտնահարուին: Սակայն Եսայեան ընդգծեց նաեւ, որ օրէնք ունենալը բան մըն է, բայց անիկա կիրարկելու մշակոյթ ունենալը բոլորովին այլ բան:

«Այլ հարց է՝ հասարակութիւնը ինչքանով պատրաստ է օրէնքի ընձեռած կարելիութիւնները օգտագործելու՝ արդար իշխանութեան հասնելու համար», ըսաւ ան:

Եսայեանի համաձայն, հակառակ անոր որ վարկանշային ընտրակարգը իտեալական միջոց չէ ընտրական իրաւունքը հարիւր առ հարիւր գործադրելու համար, բայց «մեծ յաղթանակին հասնելու համար» կողմ քուէարկած են անոր:

«Ասիկա միջանկեալ կարգ է, բայց թէ վարկանշային ընտրակարգը ինչպէ՛ս կը զարգացնենք, այլ հարց է», ըսաւ ան՝ ակնցնելով, որ նոր Սահմանադրութեան ստեղծած գործիքները ակելի արդիւնաւէտ են ու լաւ, քան նախորդինը: Եսայեանի համաձայն, ՀՅԴ-ն կ'առաջարկէ տնտեսական համակարգը այնպէս փոխել, որ ռեւէ մէկը հարստութիւն դիզելու անվերահսկելի կարելիութիւնը չունենայ, արդար արդիւնքի արդար բաշխման համակարգ ստեղծուի, որպէսզի չըլլան ծայրայեղ հարուստներ եւ ծայրայեղ աղքատներ:

Եսայեան խօսեցաւ նաեւ հրապարակուած այն ձայնագրություններուն մասին, ըստ որոնց՝ դպրոցի տնօրէնները զբաղած են ձայներու հաւաքագրումով: Անոր խօսքով՝ իւրաքանչիւր մարդ պէտք է գիտակցի իր ձայնի արժէքը եւ որեւէ պարագայի չվաճառէ զայն, անկախ անկէ, թէ ո՛վ է զայն դրողը կամ իրմէ խնդրողը:

«Դաշնակցութիւնը որեւէ վարչական լծակ չ'օգտագործեր: Նախ եթէ կ'ըսէք՝ ոլորտի պատասխանատուն Դաշնակցութիւնն է, նոյն տրամաբանութեամբ ալ օրինակ դպրոցի տնօրէնները պէտք է ձայներ հաւաքէին կամ ցուցակներ կազմէին Դաշնակցութեան օգտին, բայց փաստը այն է, որ այդպիսի բաներ չեն ըլլար», ըսաւ Եսայեան՝ ակնցնելով, որ դպրոցներու ճնշող մեծամասնութիւնը կ'ենթարկուին քաղաքապետարաններուն եւ մարզպետարաններուն:

«Եթէ կրթութեան նախարարութիւնը կը ճշդէ կրթութեան չափորոշիչները, տակաւին վարչական լծակի կիրարկում չէ՝ տնօրէնները նշանակելու, գործէ արձակելու, պատասխանատուութեան ենթարկելու, ստիպելու, որ կուսակցութեան անդամագրուին: Տուեալ պարագային խօսքը կը վերաբերի վարչական լծակին, որ կրթութեան նախարարին ձեռքը չէ», ըսաւ Եսայեան:

ՄԻՋԱԶԳԱՅԻՆ

**Յորդանանի Մէջ Արաբական Վեհաժողովը Շեշտը Դրաւ
Սուրիոյ Հողային Ամբողջականութեան Ու
Ահաբեկչութեան Վնասագերծման Վրայ**



Յորդանանի Մեռեալ ծովու շրջանին մէջ երէկ գումարուած Արաբական 28-րդ վեհաժողովի աւարտի հաղորդագրութեան մէջ նշուեցաւ, որ պաղեստինեիսրայէլեան խաղաղութեան բանակցութիւնները պէտք է շարունակուին «երկու պետութիւններ»-ու սկզբունքին եւ իբրեւ ռազմավարական ընտրանք խաղաղութեան կառչած մնալու հիման վրայ, պայմանով որ ամբողջական

կերպով վերջ գտնէ պաղեստինեան եւ արաբական հողերուն բռնագրաւումը:

Հաղորդագրութիւնը նաեւ շեշտեց, որ պաղեստինցի ժողովուրդին պէտք է արտօնուի կիրարկել իր իրաւունքները, ներառեալ ինքնորոշման իրաւունքն ու պաղեստինեան անկախ պետութեան հաստատումը: Արաբական վեհաժողովը նաեւ պետութիւններուն կոչ ուղղեց իրենց դեսպանատուները չփոխադրելու Երուսաղէմ՝ առանց նշելու անունը Միացեալ Նահանգներուն, որ մտադիր է այդ քայլին դիմել:

Արաբական վեհաժողովը ընդգծեց, որ Սուրիոյ տագնապը զինուորական լուծում մը չունի եւ անոր միակ լուծումը քաղաքական է՝ շեշտելով Սուրիոյ հողային ամբողջականութեան ու ահաբեկչութեան վնասագերծման սկզբունքներուն վրայ:

Հաղորդագրութիւնը վերահաստատեց, որ «ահաբեկչութիւնը կարելի չէ կապել որեւէ կրօնի», եւ պէտք է ամրապնդել ժողովուրդներուն ու կրօններուն միջեւ երկխօսութիւնը, հանդուրժողականութիւնն ու փոխադարձ հասկացողութիւնը:

**Բրիտանիոյ Վարչապետը Գործարկեց «Պերքզիթ»-ի
Ընթացակարգը**

Բրիտանիոյ վարչապետ Թերեզա Մէյ ստորագրած է այն նամակը, որով Եւրոպական Միութեան իշխանութիւններուն կը ծանուցուի Եւրոպական Միութենէն դուրս գալու ընթացակարգի պաշտօնական գործարկման մասին: Այս մասին կը հաղորդէ «Ռոյթըրզ» լրատու գործակալութիւնը:



Ծանուցագիրը Բրիտանիոյ մնայուն ներկայացուցիչ Թիմ Պարոուի կողմէ

Եւրոպական խորհուրդի նախագահ Տոնալտ Թուսքին յանձնուեցաւ:

Բրիտանիոյ իշխանութիւնները կ'երաշխաւորեն երկրին մէջ ապրող Եւրոպական Միութեան քաղաքացիներու իրաւունքները:

Աւելի ուշ, Մէյ խորհրդարանին մէջ խօսք մը արտասանելով Պրիքսէլի ծանուցման մասին իրազեկեց խորհրդարանին:

Գերմանիա Ինճիրլիքին Այլընտրանք Կը Փնտռէ

Գերմանական «Տի Վելթ» օրաթերթը կը գրէ, որ Գերմանիան թրքական «Ինճիրլիք» ռազմակայանին այլընտրանք կը փնտռէ:

Օրաթերթը կը նշէ, որ թուրք-գերմանական յարաբերութիւններուն մէջ ստեղծուած վերջին ճգնաժամէն ետք, Գերմանիոյ Ձախերու կուսակցութեան անդամները Պունտրսթակին առաջարկած են գերմանական կործանիչները հեռացնել Ինճիրլիքէն եւ այլընտրանք փնտռել շրջանի այլ ռազմակայաններու ծիրին մէջ:

Յայտնի է, որ այդ այլընտրանքը կրնայ ըլլալ Կիպրոսի, Յորդանանի կամ Քուէյթի տարածքին գտնուող ռազմակայաններուն մէջ:

Կը նշուի, որ Պունտրսթակի նախագահութիւնը տակաւին ընթացք չէ տուած նշեալ առաջարկին:

Եւրոպական Միութիւնը Կրնայ Թուրքիան Զրկել Ելեւմտական Օժանդակութենէն



Թրքական «Հապերթիրք» կայքը կը հաղորդէ, որ Եւրոպական Միութիւնը կրնայ մինչեւ 2020 ջնջել «Այ.Փի.Էյ.» ծրագիրի ծիրին մէջ Թուրքիոյ՝ իբրեւ Եւրոպական Միութեան անդամակցութեան յաւակնող երկրի, տրամադրուող ելեւմտական օժանդակութիւնը:

Կը նշուի, որ Թուրքիան կրնայ զրկուիլ բնապահպանութեան, մարդու իրաւունքներու, դատական համակարգի, փոխադրամիջոցներու

եւ կապի, ինչպէս նաեւ շարք մը այլ մարզերու մէջ զարգացման ուղղուած ելեւմտական օժանդակութենէն՝ միջոցները ոչ նպատակային կերպով ծախսելու պատճառով:

Այդ ծրագիրին միջոցով 2007-2013-ի ընթացքին Թուրքիան Եւրոպական Միութենէն ստացած է 4 միլիարդ 795 միլիոն եւրոյի օժանդակութիւն:

www.amtarar.com

ԱՆԴՆԱԴԱՐՁ

Խոփը Ժայռին Դպաս

Գիտութեան աներեւակայելի նուաճումները կրնան անհաւատալի բազում երեւոյթներ իրականացնել: Վերջերս կը խօսուէր մէկու մը մասին, որ յաջողած էր վայրի արջը կրթել եւ սորված երաժշտութեան մը ընկերակցութեամբ՝ արջին հետ թանկօ պարել: Իրա՛ւ ալ անկարելի ըսելու արժանի ոչ մէկ բան մնացած է երկրի վրայ, ներառեալ՝ արջի հետ թանկօ պարելը: Այո՛, կարելի է, բայց անհրաժեշտ է նաեւ չափազանց խիստ ուշադրութեամբ կատարել այդ պարը: Որեւէ սխալ քայլ կրնայ պատճառ դառնալ, որ արջը վերյիշէ իր բնագոյրը, եւ կատարուելիքները երեւակայելն անգամ սոսկալի կ'ըլլան:

Կրնաք պատկերացնել, թէ ինչե՛ր կրնան պատահիլ, երբ արջի հետ պարի ելլողը սխալի եւ իր սրածայր կրունկով յանկարծ կոխէ արջի ճկոյթին: Ո՛վ գիտէ՝ որքա՛ն վտանգաւոր պիտի ըլլան գազանին գիտական եղանակներով սորված ամէն ինչը մէկդի դնելով՝ ակնթարթի մը մէջ իր բնագոյին վերադառնալու հետեւանքները: Ուրեմն, ինքն իր գլխուն շատ մեծ նշանակութիւն մը չ'ունենար այդ գիտական դաստիարակութիւնը, եթէ պարողը զգուշ չ'ըլլայ իր քայլերուն մէջ:

Այս օրերուն Թուրքիոյ եւ Գերմանիոյ միջեւ դիւանագիտական ճգնաժամը մտածել կու տայ նման վարկած: Իրա՛ւ ալ Էրտողան եւ Մերքել միջոցէ մը ի վեր կը փորձեն թանկօ պարել: Միասին պարել կարենալու համար վերջերս երկուքն ալ յաճախակի կերպով այցելեցին միմեանց երկիրներ: Սա պահուն չենք գիտեր, թէ հանրաքուէի նախօրեակին Թուրքիոյ պետական գործիչներուն քարոզարշաւին արգելք ըլլալով՝ «շանսէօլիէ» Մերքել՝ իր սրածայր կրունկով կոխեց Էրտողանի ճկոյթին, թէ՛ նացիական մեղադրանքով Էրտողանը կոխկոտեց Մերքելի ճկոյթին: Այս հարցումին պատասխանը առայժմ յայտնի չէ, բայց այժմէն արդէն յստակ է, որ խոփը ժայռին դպաս՛ւ:

Բոլորս գիտենք, Գերմանիան՝ որպէս Բ. Համաշխարհային պատերազմին տեղի տուող երկիր, իր այդ արկածախնդրութեան հետեւանքը շատ ծանր հատուցեց՝ ամբողջ երկրի մը միասնական ամօթխածութեամբ: Համաշխարհային հասարակութիւնը չէր կրնար ներողամիտ գտնուիլ կատարուած անմարդկութեան դիմաց: Արդարեւ, Գերմանիա կորսնցուց 1920-ական տարեթիւերուն ծնած սերունդի այրերուն կարեւոր մէկ մասը: Կործանեցան քաղաքները, գրաւուցաւ երկիրը եւ հարկադրուցաւ շատ ծանր տուգանքներ մուծելու: Մակայն, այդ բոլորին ընդմէջէն, գերմանական հասարակութիւնը յաջողեցաւ իր կատարած սխալին գիտակցիլ: Այդ գիտակցութեան վրայ հիմնեց իր ամբողջ կրթական համակարգը: Չարտօնեց, որ աւելի վերջ նման պատեհապաշտներ յայտնուին եւ ցեղապաշտութեամբ թունաւորել փորձեն Գերմանիոյ ապագայ սերունդները:

Իսկ Թուրքիա՛ն, իբրեւ Յեղասպանութիւն կատարած երկիր, դիմեց հակառակ ճամբուն: Պանծացուց իր ցեղապաշտ նախնեաց արարքը, հպարտացաւ անոնց կատարածներով՝ Հետեւաբար առիթ չունեցաւ չարիքէն դաս քաղելու եւ համաշխարհային հասարակութեան դիմաց ճակատաբաց մնալու: Տիկին Մերքելի քաղաքականութեան պատճառով, այսօր Եւրոպա պատանո՛ղ է Էրտողանի դիմաց: Եւ այս իրողութեան առթած համարձակութեամբ, Էրտողան հալածեց ամբողջ գերման ժողովուրդը՝ անոր համար ամենազգայուն եղած նիւթով: Շատ կարեւոր կանխատեսում մը չէ ենթադրել, թէ այս անգամ ժայռին դիպող խոփը եւ Թուրքիան բաւական սուղ պիտի հատուցեն՝ ներքին քաղաքականութեան հաշուոյն բերնէն ելածին սահման չ'ունելու պատճառով:

ԲԱԳՐԱՏ ԷՄԴՈՒԳԵԱՆ

ՄԿՆԱՐԿ

Հեզնական Ու Կեղծ Նախանձախնդրություն

Թրքական «Կազեթետուվար» կայքը հաղորդեց, որ Թուրքիոյ նախագահ Ռեճեփ Թայիփ Էրտողան յայտարարած է. «Քրտական ջոկատները պետք է լքեն սուրիական Մընպեժը, անիկա արաբական հող է»:

Հեզնական է, որ սուրիական Ալեքսանտրէթը, Հիւսիսային Կիպրոսը եւ Արեւմտեան Հայաստանը բռնագրաւած, հիւսիսային Սուրիա ներխուժած եւ իրաքեան Պաաշիքա շրջանին մէջ անօրինական զինուորական ներկայութիւն հաստատած երկրի մը նախագահը նախանձախնդրութիւն կը յայտնէ արաբական հողերուն նկատմամբ:

Ան նաեւ կը նշէ, որ թրքական զինեալ ուժերը ամէն գնով Մընպեժէն դուրս պիտի մղեն Սուրիոյ տարածքին մէջ գործող քիւրտ զինեալները՝ այդպիսով «Եփրատի վահան» գործողութեան ծիրին մէջ սուրիական հողեր ներխուժած իր երկրին զինեալ ուժերը ներկայացնելով իբրեւ արաբական հողերը քիւրտերու բռնագրաւումէն ազատագրող փրկարար բանակ:

Էրտողան Սուրիոյ քիւրտերը կը նկատէ եկուորներ եւ անկոչ ու անբաղձալի հիւրեր: Ան կը մերժէ Սուրիոյ ընկերութեան մէկ անքակտելի մասը եղող քիւրտերուն սուրիացիութիւնը, ճիշդ ինչպէս կը մերժէ Թուրքիոյ քիւրտերուն եւ այլ փոքրամասնութեանց քաղաքացիութիւնը կամ լաւագոյն պարագային լիարժէք քաղաքացիութիւնը:

Էրտողան քրտաբնակ Մընպեժի արաբական տարածք ըլլալուն վրայ պնդելով կ'ուզէ հիւսիսային Սուրիոյ մէջ ժողովրդագրական պատկերի փոփոխութիւն կատարել. յանցանք մը, որով ան շարունակ կը մեղադրէ քրտական ուժերը: Աւելի'ն, ան տողատակի իր պատրաստակամութիւնը կը յայտնէ՝ իբրեւ միջին լուծում ընդունելու Մընպեժի վրայ սուրիական բանակին վերահսկողութեան հաստատումը, պատրաստակամութիւն մը, որ նախապէս հրապարակաւ յայտարարուած էր Թուրքիոյ վարչապետ Պինալի Եըլտըրըմի կողմէ:

Արաբական հողերուն նկատմամբ Էրտողանի նախանձախնդրութիւնը կեղծ է. անոր նպատակը հիւսիսային Սուրիոյ մէջ քրտական ինքնավար մարզի մը ձեւաւորման հեռանկարին կանխարգիլումն է: Անոր յայտարարութեան դրդապատճառը արաբական հողերուն նկատմամբ նախանձախնդրութիւնը չէ, այլ քիւրտերուն նկատմամբ թշնամանքը:

ՎԱՀՐԱՄ ԷՄՄԻԵԱՆ

ԼՈՒՐԵՐ ԳԱՂՈՒԹՆԵՐԷՆ

Հայկական Ժողովրդական Երգ Ու Պար՝ Քիելի Միջազգային Օդակայանին Մէջ



4 մարտին Քիելի միջազգային «Պորիսոփոլ» օդակայանին մէջ ներկայացուեցան հայկական պարի ասանդոյթները: Քաղաքի հայկական համայնքի ժողովրդական երգի ու պարի «Հայրենիք» խումբին անդամները օդակայանի սրահին մէջ ներկայացուցին հայկական պարեր, իսկ Արտակ Մելքոնեան մեկնաբանեց հայկական ժողովրդական երգեր:

պարի ազգային ակադեմական վաստակաւոր խումբէն եւ փոխանցած՝ «Գնչուական մեղեդիներ» խումբին:

Հայկական խումբը «Ֆլեշ-մոպ»-ի հերթափոխը վերցուցած է Ուքրանիոյ «Փաւել Վիրսկի»

«Յակոբեան» Առեւտրա-Արդիւնաբերական Ընկերութեան Նոր Վաճառասրահի Բացում



9 մարտին Թեհրանի «Էսփինաս» սրահին մէջ, ձեռամբ թեմի առաջնորդ Սեպուհ արք. Սարգիսեանի, տեղի ունեցաւ «Յակոբեան» առեւտրա-արդիւնաբերական ընկերութեան նոր վաճառասրահին բացումը:

ինքնատիպ ասպարէզով եղբայրները մեծ ներդրում բերած են ու կը բերեն Իրանի Իսլամական Հանրապետութեան առեւտրա-արդիւնաբերութեան գործին, որ մեծ պատուի եւ հպարտութեան առիթ է :

Սրբազան հայրը շնորհաւորեց Սմբատ եւ Հարմիկ Յակոբեան եղբայրները՝ իրենց նախաձեռնող հոգիին համար եւ մաղթեց յաջողութիւն ու առաւել արդիւնաւէտ գործունէութիւն : Ան յայտնեց, որ սոյն

Տոհմիկ Երեկոյ



Կազմակերպութեամբ ՀՅԴ «Ռոստոմ» կոմիտէի յարաբերական յանձնախումբին, մասնակցութեամբ Քեսապի ուսումնասիրաց միութեան եւ Սիսի, Ուրֆայի եւ Մուսա Լեռ հայրենակցական միութիւններու վարչութիւններուն, 18 փետրուարին, Էնսինոյի Ֆերահեան Ազգային վարժարանի «Տիգրանեան» սրահին մէջ տեղի ունեցաւ տոհմիկ երեկոյ:

Երեկոյի բացման խօսքը արտասանեց Մարալ Մանուկեան, ապա Սրբոց Նահատակաց եկեղեցւոյ հոգեւոր հովիւ Ռազմիկ Ա. քնյ. Խաչատուրեան

կատարեց սեղանի օրհնությունը: ՀՅԴ «Ռոստոմ» կոմիտեի ներկայացուցիչ Հրայր Նահապետեան խօսք առնելով՝ ըստ, որ Սփիւռքի տարածքին նման երեկոներ մեզի կը յիշեցնեն մեր ծննդավայրերն ու հայրենիքը՝ մեզ կապելով մեր արմատներուն եւ սերունդէ սերունդ կը պահեն մեր հայկական սովորություններն ու ասանդությունները, որոնք մաս կը կազմեն մեր մշակոյթին: Ան նկատել տուաւ, որ ՀՅԴ-ի կողքին, սփիւռքի տարածքին երբ հայրենակցական միությունները կազմուեցան, անոնք յատուկ առաքելութիւն ունէին հայապահպանման աշխատանքներու մէջ աւելցնելով, որ այսօր պատկերը նոյնը չէ, հակառակ անոր որ մենք զմեզ տեղացի կը զգանք, եւ տարբեր գաղթօճախներէ նոր եկողները նուազած են, սակայն հիմնականը կը մնայ նոյնը, մենք դարձեալ կը զգանք միասին ըլլալու անհրաժեշտութիւնը, զիրար տեսնելու եւ ընկերային շրջանակին մէջ մեր տեղն ու կարեւորութիւնը ունենալու հրամայականը, եւ նման երեկոներ անոնց հարազատ միջավայրներն են:

Ապա յաջորդաբար խօսք առին հայրենակցական միություններու ներկայացուցիչները. Ուրֆայի՝ Մարալ Վարժապետեան, Մուսա Լեռի՝ Վահրամ Շեմմասեան, Սիսի՝ Աբօ Ճապարեան եւ Քեսապի ուսումնասիրաց միութեան՝ Յուլակ Աբելեան, որոնք իրենց մտածումները եւ յուշերը պատմեցին ներկաներուն՝ շեշտը դնելով միասնականութեան եւ ազգապահպանման հրամայականին վրայ:

Արա Կիւլեր Կը Ստանայ Պատուոյ Մրցանակ



Ներկայութեամբ Նիւրենպերկի ասագ հիւպատոս Եաւուզ Քիւլի, վերջերս Նիւրենպերկ քաղաքին մէջ, 22-րդ անգամն ըլլալով, տեղի ունեցաւ «Թուրքիա Գերմանիա» ժապաւէնի փառատօնը, որուն ընթացքին Նիւրենպերկի քաղաքապետ տոքթ. Իւրիխ Մալի համաշխարհային չափանիշով պոլսահայ նշանաւոր լուսանկարիչ Արա Կիւլերին յանձնեց «Պատուոյ մրցանակ»-ը:

Հանդէսի ընթացքին ցուցադրուեցաւ Արա Կիւլերի կողմէ նկարահանուած լուսանկարներով տեսերիզ մը, ինչպէս նաեւ՝ իր կենսագրութիւնը, որ կը կրէ «Պոլսոյ աչքը» խորագիրը:

Հայ Եկեղեցւոյ Հիմնադրութիւն



Վերջերս Նոր Զելանտայի համայնքի փոխատենապետ եւ նորաստեղծ ծխական խորհուրդի անդամ Զաւէն Փանոսեան հանդիսաւոր կերպով ազդարարեց հայ եկեղեցւոյ հիմնադրման սկիզբը: Ծխական խորհուրդը հիմնուած է կատարելու համար եկեղեցւոյ հիմնադրման աշխատանքները: Փանոսեան նկատել տուաւ, որ Հայ Առաքելական եկեղեցին մեծ նշանակութիւն ունի մեր ժողովուրդի հոգեւոր եւ ֆիզիքական պահպանման

գործին մէջ եւ կը շեշտէ անոր կարեւոր դերը սփիւռքի հայապահպանման գործին մէջ: Առ այդ, ամիսը անգամ մը Ս. պատարագ պիտի մատուցուի տարբեր եկեղեցիներու մէջ, մինչեւ հայ եկեղեցւոյ կառուցումը: Յայտնենք, որ 18 մարտին Սիտնիէն ժամանած Աւետիս քինյ. Համբարձումեանին կողմէ մատուցուեցաւ Ս. պատարագ:

ԱՅԼԱԶԱՆ

Վարքի Հիմնական Կանոններ՝ Երեխաներուն Համար

Յաճախ կը պատահի, որ երեխաները իրենց կոպիտ կամ անքաղաքավար ընթացքով նեղ կացութեան մատնեն իրենց ծնողները: Պէտք չէ զանոնք մեղադրել, եթէ փոքր տարիքէն անոնք չեն սորված կենցաղավարութեան հիմնական կանոնները:

Ստորեւ՝ վարքականոնի պարտադիր կէտեր՝ միշտ ի մտի ունենալով, որ երեխաներուն լաւագոյն օրինակը ծնողներն են:



- . Երեխային սորվեցնել «խնդրեմ» ըսել, երբ ան որեւէ բան պիտի ուզէ:
 - . Երբ ան բան մը ստանայ, պէտք է «շնորհակալութիւն» յայտնէ:
 - . Երբ երեխան սխալի «ներողութիւն» պէտք է ըսէ:
 - . Ան պէտք է գիտնայ, որ մեծերուն խօսակցութեան միջամտելը կամ անոնց խօսակցութիւնը ընդհատելը սխալ է:
 - . Երբ երեխան ուրիշէն իր մը պիտի վերցնէ, անպայման պէտք է ստանայ տիրոջ հաւանութիւնը:
 - . Երեխան պէտք չէ բացասական բառեր, հայիոյանքներ օգտագործէ, մանաւանդ՝ ուրիշներու ներկայութեան:
 - . Բոլոր մարդիկ ի ծնէ հաւասար են, հետեւաբար երեխան պէտք չէ ծաղրէ ուրիշը՝ ֆիզիքական թերութիւններուն համար:
 - . Երբ երեխան սենեակ մը պիտի մտնէ, նախքան մտնելը անպայման դուռը պէտք է թակէ:
 - . Եթէ խաղի ատեն կամ այլուր սխալմամբ ուրիշին զարնուի, ան անմիջապէս ներողութիւն պէտք է խնդրէ:
 - . Երբ պիտի յօրանջէ ան ձեռքով բերանը պէտք է ծածկէ:
 - . Ընկերներու, ծանօթներու հանդիպելու պարագային ան անպայման պէտք է բարեւէ:
 - . Ճաշի սեղանին շուրջ ան պէտք է վարժուի դգալ, դանակ եւ պատառաքաղ գործածել:
 - . Լեցուն բերնով ան պէտք չէ խօսի:
- Շարքը երկար է, սակայն այսքանն իսկ բաւարար է, որ երեխան դառնայ բարեկիրթ եւ օրինակելի:

Պահքը Նիհարնալու Միջոց Զէ

Այս տարի Մեծ պահքը սկսաւ փետրուար 27-ին եւ պիտի երկարի մինչեւ ապրիլի 16-ը՝ Ս. Զատիկ:

Պահքը օգտակար է նաեւ բժշկական տեսակէտէ, քանի որ զարնանամուտը առանց ճարպային, կենդանական սնունդի անցընելը դրական ազդեցութիւն կ'ունենայ մեր մարմնին վրայ: Սակայն սխալ է այն մտայնութիւնը, որ պահքը նիհարնալու միջոց է:

Պահքը չի սահմանափակուիր միայն կենդանական սնունդէ հրաժարումով. անիկա առաջին հերթին հոգեկան ու բարոյական ամէն տեսակի ախտերէ եւ գործերէ մաքրուիլն է, զոջումով եւ ապաշխարութեամբ աստուածահաճոյ եւ արաքինի կեանքի դառնալն է:

Պահքի շրջանին կարելոր է պահպանել հոգեւորը, ինչպէս եզնիկ կողբացին կ'ըսէ. «Մէկը կրնայ անասունի միս չուտել, բայց անընդհատ իր եղբօր միսը ծամել»:

Հաղորդագրություն

«Նոր սկիզբ եւ արդար Հայաստան» կարգախօսով Հայ յեղափոխական դաշնակցութեան հայաստանեան կառոյցը, պիտի մասնակցի Ապրիլ 2-ին կայանալիք Հայաստանի Ազգային ժողովի ընտրութիւններուն:



Նոր սկիզբ մը եւ նոր հանգրուան մը կը սպասէ ամբողջ հայ ժողովուրդին, անկախ Հայաստանի պատմութեան մէջ: Հայաստանը իր նոր սահմանադրութեամբ կոչուած է փոխելու երկրի կառավարման փիլիսոփայութիւնը, ուր նախագահականը իր տեղը պիտի զիջի խորհրդարանական հաւաքական պատասխանատուութեան ղեկավարման դրոյթին:

Համակարգային փոփոխութեան գործընթացը մեծ մարտահրաւեր մըն է մեր ժողովուրդին համար եւ յատկապէս անոր քաղաքական կազմակերպութիւններուն: Դաշնակցութիւնը խոշորագոյն ներդրումը ունեցած է Հայաստանի նոր սահմանադրութեան մշակման ու որդեգրման աշխատանքներուն մէջ, չըսելու համար, որ անոր համահեղինակն է: Հետեւաբար, Դաշնակցութիւնը քաջ կը զիտակցի, որ պատմական ու ճակատագրական յաջորդ հինգ տարիներու ընթացքին, ծանրակշիռ պատասխանատուութիւններ կը սպասուին իրմէ:

Դաշնակցութիւնը արդէն այսօրուրէն իսկ, համոզումով ու հաւատքով ընդունած է այդ մարտահրաւերը:

Մենք սփիւռքի մէջ մեծ հիացմունքով կը հետեւինք, հայրենի դաշնակցական ղեկավարներու ընտրական քարոզարշաւի ելոյթներուն:

Տեսէ՛ք, անոնք չունին ամպագորգոռ յայտարարութիւններ:

Անոնք երբե՛ք հանդէս չեն գար սին խոստումներով:

Անոնք ամենայն անկեղծութեամբ, մեր ժողովուրդին կը ներկայանան իրենց իրատեսական ծրագիրով:

Արդարեւ, պատմական ու ճակատագրական այս ընտրութիւններու սեմին, մենք մեր ամբողջական զօրակցութիւնը կը յայտնենք Հայաստանի Դաշնակցութեան ողջ ընտանիքին եւ կը դիմենք հայրենի մեր ժողովուրդի զաւակներուն, որ անվարան իրենց առատահոս քուէները տան Դաշնակցութեան օգտին, առիթ ընծայելով իրեն, որ իր համահայկական կառոյցի ողջ ներուժը կարողանայ ծառայեցնել, յանուն Հայաստանի հզօրացման, յանուն ամբողջ հայութեան երազած արդար-բարեկեցիկ եւ հզօր Հայաստանի տեսլականի իրականացման:

ՀՅԴ ՔՈՒԷՅԹԻ ՀԱՅ ԴԱՏԻ ՅԱՆՁՆԱԽՈՒՄԲ

25 Մարտ 2017

Քուէյթ